

校正翼駟稗編卷四目錄

義雀

誤掘窖

魏國英

衣怪

狐戲

徐叟

凌大郎

狐薦館

雷異四則

石生足

狐放火

瑞金奇案

產怪

樟棚神

都司討債

火焚人不當水死

四園怪

水鬼被紿

蝟怪

財運

海寧相國

張魯傳先生

史孝廉

浙江臬署魂

鰓怪

落星石

陸大相公

劉翁開礦

天誅不孝

蔣二尹

狐穴

僵屍與龍鬪

室女被焚

龍四則

西湖廢寺

燕郊廢寺

小河水神

長三四六

烟戲

纓帽制虎

生魂忘死

生魂搶食

城隍辦差迎節母

李天寶

陰兵

川福

中之壁

劉加年

惜字益算

陰陽差役串騙

生人血可壓鬼

小人

魏封翁

幕友阻撓善舉

乩仙前知

遇合定數

酒仙

鼠報恩

某太守

么四

鬼預看停靈之所

鬼父護兒

錢生

十九貓同時殉節

鸚鵡報讐

山陽狐

剪雞毛

徐旭

木客

漢口災

女鬼開燈

鬼贅壻

伍八

四喜

煞神

佛手傾家

左中丞驅縊鬼

校正翼駟稗編卷四

北平 湯用中 芷卿 著
武進 徐廷華 子榜 評

義雀

甲申歲余自都訪戚至北路廳署下榻衙齋辰起一雀飛集案頭向余而噪似有所訴旋飛出戶隨之集衣衿間頻睨梁上取長竿探之見蛇方困一雀蜿蜒避去雀已死此雀向之哀鳴若傷悼然作義雀行記其事遊中州時稿已散失略記於此

徐子楞曰少時讀義鷗行未嘗不掩卷太息然固鶻也雀則微矣不忍同類宛轉求援人禽之別果有異乎讀昌黎羅池君傳又何說也

誤掘窖

常郡戚墅堰劉某饒田宅每月朗風清之夕常見一人白甲戎裝往來田畔意爲財神下必有窖乘夜祭而掘之得石匣盛白骨一具亟爲掩埋已暈絕及蘇瞪目大呼曰我孫吳大將韓明也與黃祖戰死爲敵所焚吾主憐其忠拾骨瘞此千餘

年爾何人敢發掘耶必斃爾忽嘔血死

陸大相公

華亭秀才陸某武斷一鄉人皆惡之偶縱飲歸落水死往往爲厲被祟者退之之法製長綵盤金小帽紮紙人如陸狀戴之預備一舟門外設酒饌扶紙人置疾者床前三二鄰老互相勸酌少時則曰房中苦悶蓋移席於堂少飲移席門外又少飲則曰何不上船一游遂拉衆共登故擠紙人於河羣譁曰陸相公落水矣鬼即去其帽浮沉水面人不敢取須兩人設爲問答甲曰噫浮水者非小帽乎盍取之乙曰陸相公帽不可動也甲勃然曰人皆畏陸我獨不懼即戟手指河大罵逕入水取帽去亦無恙

魏國英

宿遷呂太守攜眷赴任道出山東池河鎮大雨衢路皆溢至一橋一人橫刀立厲聲索資時雨愈傾注河流驟漲行李皆沒殊難進退有老叟向呂曰此阨非魏五爺不解盍求之所居離此里許耳呂冒雨策蹇往一偉丈夫科頭出曰太守亦知人間有魏國英乎呂備訴所苦曰易耳戛然一呼數百人立階下令曰將太守眷

口車輛來，遂蜂擁去。頃之十數輿皆擎舉而至，旋有婦人出迎，眷屬入，即具盛饌。爲呂勸酬，談辯風生。夜分乃罷。呂以其豪雅，頓忘羈旅，留三日，始別出金酬之。拒不納。更以小紅旗付呂，曰：「但插此車上，千里皆坦途。」云。

衣怪

道光元年秋，余館浙之德清。月夜與幕中諸友飲，街鼓三下，風露漸侵。有胡友令僕取衣，久不至。胡自往，亦不至。趨視之，則胡與僕皆仆地。喚醒，問之，曰：「入房見一袍人立榻上，駭絕。而仆後入都寓，東華門同寓許姓衣肆購一袍，疊置臥榻，忽忽出門，及歸，忽失所在。疑人竊取，回首則袍植立門側，駭呼同寓，始倒地。細辨之，領緣微有血漬，疑罪人，着以就刑者。」然胡袍確係新製，不知爲何物所憑。

劉翁開礦

山西平遙劉翁年四十許，入都爲京債局司炊爨。某令選雲南向局借銀三千兩，署券一萬，局夥皆以道遠不肯隨往。取債主局者察劉謹慎，令偕之，慎戒不得全金，勿返。某缺甚瘠，經年僅還原銀三千兩。劉遵前戒，不受在署。無事，晉省以廣見聞，遇素識某爲撫署司閫之重臺，問何來，告之。故曰：「若然，可亟歸取銀。」某令已因

案被參矣劉遂返署取銀仍赴省擬結伴入都寓中有談開礦獲利者劉心動探聞某山銀苗最旺携資往設廠募開自春徂冬無所獲同時他廠獲銀甚豐演劇酬神酌酒相慶劉資已罄且負累多憤欲投繯衆夫拉勸曰我等爲君搜採經年無銖累獲亦切愧恨今尙餘米一石當共飽食爲君再開如仍無所得則我等心盡生死惟君劉曰既荷諸君高誼我當爲諸君先乃卸長衣持斧鑿偕諸人入甫入劃然一聲石開銀沙滿焉衆并力攻進三十里皆銀沙也於是驟擁厚資由雲南設肆至京師由京師設肆至山西往返過行尖宿皆在己肆爲平遙巨富焉

狐戲

京師劉文正公賜第廳事門額上排綽楔五外覆花簷一僕夜醉歸至明遍尋不得聞綽楔上有髯駒仰視僕臥其間呼醒爲花簷所隔不能下去簷梯引之始下云昨夜歸即有數友邀飲樓上不知何以得入也

河間李翁性方剛繩子尤嚴子頗文秀性佻達其家後圃有樓三楹相傳爲狐所居生慕鳳仙青鳳等豔慧每至樓下禱焉願爲其家婿一日經過見垂髫婢嬌豔絕倫招之隨行迴廊曲折亭閣參差門徑重重似歷多所須臾登樓陳設多珍光

燦一室上設小螺鈿牀青紗帳垂隱約有麗人臥婢悄語曰姑娘嬌雅羞見生人可自就榻語畢遽去生解衣上床女嫣然閉目臥近接其吻大呼驚視父翁也生驟覩如喪魂魄躲跪不言大被笞楚

徐叟

徐叟年六十餘檢拾字紙甚勤一日病死至一公廨見古衣冠者七人本朝服飾者三人坐堂上謂徐曰汝生平無大過且勤於拾字加壽一紀可速還陽徐訴孤苦多病卽再生亦不能糊口神曰第回無慮一跌而醒死已兩日因覓棺不得故未殮也病頓愈一日文昌宮焚字紙灰中得朱提六枚作小經紀居然溫飽逾年於野外有藤絆足掘之得首烏二枚蒸食之精神踰少壯比鄰蔡某生子啞十六歲不能言聞叟拾字得神佑亦發願檢拾日攜其子肩擔赴街巷風雨不止三年能言書此勸世之惜字者

天誅不孝

丹陽農家子忤逆母役同奴隸冬日與妻臥呼母抱幼孫朝起炊粥粥沸吹之熱氣騰灼目不能開孫忽躍鍋死母急逃至女家不孝子起見兒死抽刀往轉念姊

必救阻藏刀道傍樹中往見母詭言兒醒促母歸姊窺其顏色不善遂同行至樹間探手入抽刀樹忽合力拔不出視之已長成如一矣過者駭問緬述其事每日僅食一餐云有神守之不令多食就樹架茅爲屋以蔽風雪遠近觀者如堵輒助其母數文母以是稍自贍年餘子兩腿肉片片自落漸及胸腹肩臂若鱗剝然五臟皆出頭乃旋落妻取其骨埋樹下夜暴雨擊出擊如紛妻亦震死

凌大郎

凌大郎先伯兄乳軀子也少貪色成癢疾臨死猶緊握妻手不放譬之始開後其母因無子令媳贅村人爲嗣婚有日矣媳偶上樓取物見凌驚跌梯下合昏夕男女皆陰痛如割不能成禮母怒向棺以桃枝鞭之始不復崇

狐薦館

永定河北七工官廨一所備觀察節汎暫駐平時則扃鎖之駐工縣丞吳某因衙署窄小暫借爲子弟讀書所館師某浙江秀才也每作文輒被墨汚狼藉知是狐虔禮之而擾如故不得已避去吳乃焚香往祝曰某師爲仙人所驅不敢再來但某官貧署窄子弟又不能不令讀仍須借此設帳願勿再擾次早儿上得一帖曰

某生人品既陋文理亦謬何可使教子弟君如欲延師上海蘇秀才現在京師西直門某胡同待聘宜往延之吳如言專人往蘇方於某都統家辭館出延至署循循善誘諸生日有進益聞述及狐仙相薦事蘇茫然不解狐何由賞識而爲之推轂也

蔣二尹

吾常蔣二尹需次永定河胡筠初通守與居最久筠初嘗爲余言蔣目能視鬼常偕行街市輒作遜避狀云鬼喜近人得霑溫氣凡人烟湊集處鬼尤多一日同游湖上行宮返廬饑甚欲飯遍尋厨夫不知所往或言曾見其偷入行宮蔣大驚曰果爾必爲鬼迷胡問何以知之曰適偕君游見山石後五六鬼蓬首垢面伸頭探腦似作尋人狀恐不免爲所弄覓之果倒臥石後昇歸救逾時始蘇云頃見宮門美婦二人招之隨至石邊突出數獐鬼攫之倒地欲拖入井抵拒間而人來救我矣胡嘗偕蔣解餉赴順義止宿署西城隍廟殿後次日蔣欲移廬時方盛暑室頗涼敞胡不肯蔣決舍去曰此非善地冥官繫囚所也挨肩疊背余榻皆滿故欲挪避耳多市錫楮焚之間蔣鬼作何狀曰皆有喜色不復擾矣越日遂行蔣以疾早

卒蓋目能視鬼其陽氣多不振也

雷異四則

蘇州某殿元家門前石碑樓上雕繪人物數百極工妙一日暴雨從牌樓下直入大門由廳後穿出雨過牌樓上石人皆失其首悉置廳後窗格中

常郡莊秀才某館鳴珂里鍾姓館門外常有一癩犬臥焉一日雷鑿犬斃得小鑿一柄非石非金利銛異常削玉如泥病瘡佩之輒愈後爲江西賈以百金買去先伯祖任廣西方伯時夏月晝長無事幕友二人圍棋忽驟雨雷火擊入二人駭絕伏地雷逕穿後院去起視棋盤棋子皆失尋至後院乃在牆陰下滿局如故一着不亂牆上有字跡類蟲篆莫能識

常之橫山橋鄉富戶某一子病瘵臥樓垂危其婦偕一老嫗守之樓下召縫工爲製殮具忽大雷雨衆縫工見火毯滾入由下滾至樓上逕登榻踞病者腹婦及嫗皆駭仆少頃霹靂一聲穿屋去疑病者必震死奔視病若失云雷踞腹時覺腹中五臟如灼似有物蠕蠕然自下體出俄聞爆然震響不知人事矣檢視一物似蛇非蛇長三寸許已頭裂而斃火過處衣衾悉成灰燼

石生足

邳州西郊農家子偶山行見道傍一石方正可作礪裹以袱負之而行及半程石忽蠕動有四足破裹出攫入膚理農駭痛暈仆遇鄰人舁歸移時始甦石足已與肉合稍一觸動痛徹心骨遂背負僂僂而行十餘年農死并殮焉

狐穴

張公運泰觀察永定河拆一舊坎空洞如屋棹椅碗碟皆備悉泥爲之極光滑精緻穴中遺二小狐張命取去河卒王喜恐其爲幻喂以果餌裹以絮而匿藏之及旦已失惟存朱提二枚狐蓋德而報之也

狐放火

永定河三角淀通判署後有屋一間狐所居也向扁閉胡君筠初蒞任以人多啓而居之遂大擾偶以錢二千置床下串不解而中二百已脫去胡夫人臨窗刺繡一巨石擲入石大於窗楞從手際擦過窻嵌玻璃絲毫無損手亦不傷後圃草垛忽火方撲滅別垛又燃舉家共聚晚餐臥房突有烟起燭之烟自所挂畫後出揭畫所糊盡焚畫固無恙不堪其擾仍讓屋具牲醴祭之乃絕

瑞金奇案

惲子居先生令江西瑞金有瘍醫陳某忽發狂疾持藥刀奔署殺斃皂役數人逕入宅門闔人夏貴被斫數段又殺五六人乃奔捕衙殺斃五人門子探視甫伸頸被斫急以手按其頭闔扉入白殺人狀言畢首墮兩署共殺二十四人集多人擒詢之陳曰今日飯後臥忽有猙獰惡鬼數人授以刀入署殺牛馬豬羊甚夥不知其爲人也刀極鈍切肉且不能入家奴陸順時在惲署見其行兇躲鼓架下陳竟未見時子居先生方公出幸免處分後陳定斬梟未及正法病死

徐子楞曰非常之變突出几席惟內省無疚者可自信焉

僵屍與龍鬪

河南西華縣東鄉繆叟瓜時結團蕉田畔以便看守每三更許輒見一女子紅衣綠裙從田左過將曉則返尾之入破廟去明日至廟塑像外悉無存顧村中少年及小兒往往暴死叟疑其魅莫可爲計適驟雨一龍飛至廟前一物渾身白毛狀極猙獰立廟脊上張口吐氣赤如火兩手作攫拏狀龍鬪移時敗去旣而疾雷暴至物吐氣如前霹靂一聲始仆衆趨廟祝神座下提出一棺衣衾灰燼一女屍僵

臥棺中如所見物狀焚之村中遂安

產怪

常郡城隍廟後孫姓產女三目兩角赤髮藍身自斷臍帶繞地走條忽長二尺餘產母驚死其父率家人持杖仆之活埋後圃三日猶聞啼聲

表弟劉季良妻產一胎連胞墮地剖視貓頭兩眼開口作翕張頰以下渾沌如布袋無手足釘之樹上半月後口眼猶能運動

樟柳神

余少時至戚家適術者爲人算命每日止算八人大抵已往事多驗出樟柳神囊中則方寸木刻童子形向人呀嚶作語能誦千家詩數首置人手掌中人立拱手宛轉如生

劉福田刺史官無爲時寵一伶性嗜博金錢到手立盡衣裝盡罄惶遽欲死或教曰何不購一樟柳神得預知采色則博可常勝信之購以重金每博必先夕叩問往輒大負厲聲語之曰賭神即財神禁我勿實言我何能爲投之火中號呼而絕室女被焚

上元張氏女年十七一日有內戚至飯畢其母偕女送登輿至門適鄰人燃着爆竹火一星落女衣登時焰發愈撲愈熾須臾焚死及殮遍體焦黑面如生

都司討債

武進西鄉巢翁善居積財雄一鄉與都司某交最密都司積數千金陸續交巢營運而未立券一日暴病死家人雖微知之而事無左證巢遂乾沒巢年已五十餘忽納妾有娠夜夢都司來遂生一子名恩絕聰慧翁束之嚴少長漸出門與人飲博性揮霍不數年翁所畜盡罄憤懣成疾將死呼恩至曉之曰我負汝者汝盡蕩去我亦不較惟我生平手自積累與汝無干何乃亦欲傾之耶恩笑曰上帝命也翁所致財產其來尙可問耶翁隨卒遺榘尙露河濱

火焚人不當水死

余旅人某渡鄱陽湖舟覆落水爲夜叉所得忽朱衣人至曰渠非刼中人叱令送歸夜叉挈之行水底迅疾如風擲之岸灘半日而蘇則在江西界矣附舟而歸以爲神助福且無量一夜醉歸吸烟遺火榻上遂被燒死余所目覩家奴子朱川二隨楊星園觀察赴粵東渡海船壞附一板浮沉洪濤巨浪中五日

始遇救以爲大難不死可望長年越歲在臬署飲燒春數斤大醉吸烟未數口火自鼻出須臾焚死而衣服如故

龍四則

余童時及見先太宜人乳母李嫗言渠家太湖濱水中浮龍身一段長十餘丈粗二十餘圍鱗甲大如箕兩頭似刀截者村人用長絙拉至岸斧之甚腥穢骨節可作春臼分鱗一片盛夏懸室中蛟不敢近云

海州有垣丁赴雲臺山歸道經一山遠望黑龍昂首山嶺尾蜿蜒繞山足四爪皆露鱗甲翕張輿夫知有異亟繞路歸未半途霹靂一聲龍入雲際俄而急雨傾注雹大如盂盎屋瓦皆碎牲畜在野者多擊死蓋螫龍之上升者

長隨孫某在安徽太湖縣服役縣東北八里即太湖湖中觀音山四月八日香火極盛是日奉差經過見山下排列香案土人云迎龍來朝山者湖中赤青龍各一每年一龍來朝青龍居多言甫畢風雷大作波濤洶湧登高阜望之果一龍隨波而至近山半里風定浪平龍昂首水面屹立不動牛角兩角長七八寸旁有小叉鼻旁白鬚二長五六尺頭以下俱沒水中腥聞數里蠅蚋飛集無算約一時許波

浪復起風雷從之南去而沒

淮北青口鎮一白龍墮入鹽池長數十丈半日許蜿蜒入一古寺中塞戶而進吼聲如牛羣蠅數百萬隨之僧大駭焚香誦佛兼爲洗濯留寺三日忽大雷雨擎空而去寺井有石正方甚光滑龍以舌舐之涎著石上初甚腥曝乾後結成碎粒錯落如珠刮之得三兩許卽龍涎香也

西園怪

揚州西園多梅花時遊人甚衆尋常扁鐻王秋卿郎中桂爲諸生時偕數友往遊時新雨甫霽命園丁啟門入行至後院聞婦女哭詈聲似妻責其夫者云終日閒遊不歸牆倒兒被壓死亦不知人之無良何至是耶其婦不答夫又唧噥之夫曰汝不避屬垣耶夫問何人曰王道台也其聲遂寂王視後院牆內外並無居人破屋一椽半壁新塌而已

水鬼被給

余少時家僕佛元住門前水閣中每夜聞人呼其名知爲水鬼不之應一日河邊濯足有物從水底掣其足甚急佛元嘆曰似此人身生不如死何不略寬待我脫

衣人水與君等共浴耶語畢掣者頓釋逃歸夜聞繞門罵詈聲月餘始止

西湖廢寺

西湖上有廢寺佛像露處寺僧覆以蘆席歷募修復苦無檀越有僕從甚盛簇擁一人入寺遊囑慨然歎息有興復之志越日遣送千金至令僧鳩材庀工尅日脩舉並自延塑匠十餘人先新佛像月餘刮洗淨盡扁殿去已而寂然遍訪絕無音耗一日啟殿得片紙於佛耳中云寺爲明鄭貴妃令太監鄭衆監造十八羅漢三世佛用赤金塗成眉心佛光皆東珠余悉取去敬留侍者二尊刮金鎔之修寺有餘僧大悔恨如言得金四百餘兩糾工興修煥然一新

蝟怪

陽武縣某村有小廟神最靈觸之殃禍立至以故遠近敬禮鎔赤金爲眼珠靈性亦範銀爲之有虞某者貢博不能償乘夜着青蓑入廟推神仆盡攫其金去明日神附廟祝召村人至告以被賊衆叩竊者姓名神曰睡夢中見一物青而毛比醒追之已杳不知爲何類也虞將金銀付質連博大勝不數月所質悉復心終不安仍夜往還之甫啟門見燈燭輝煌知爲村人所陳牲醴乃伏暗陬少頃神龕中一

蝟長三尺餘據案人立引觴大啖須臾頽然伏案虞頓悟憑神作威福者此也逕前捉縛貢以歸蝟醒謂虞曰與爾無讐如見釋當以千金奉報虞不願促妻沸湯投釜加薪焉香火頓絕廟亦燬

財運

京師隆福寺每月九日百貨雲集謂之廟會有王翁携幼孫方十歲往遊見一紫檀界尺愛之強翁買歸玩弄偶擊几上劃然一小抽屨脫出中藏東珠十枚翁狂喜驟獲珠價加以營殖遂成巨室至今呼爲珠子王家

一士人遊東華門見古董肆懸小皮簾時夏月思襯腕作書頗涼爽以二百錢得之數日皮縫裂中藏東坡行楷十幅倪迂山水十幅皆真蹟也售之得二千金京師黑市大抵皆鼠竊輩詐僞百出貪賤購覓往往被給亦間有獲厚利者桐城方某乘夜往市一人以襖裹一裘求售捫之襖頗光滑裘亦輕軟以賤值得之迨曉啓視則錦襖裏貂裘一襲不覺狂喜展裘墮地有聲又得珊瑚素珠一串鬻之陡獲千金

杭州張某遊京師數年無所遇困極欲歸苦難就道聞多棋千廟神甚靈凡人命

註財祿皆可預借驗後酬以棋千或二或四久而成林張因往禱夜夢神教其往神武門以俟醒而異之如言往竟日杳然如是月餘寢倦矣一日伺至日中饑甚姑向餅師謀果腹見間壁荒貨店有鐵象棋一盒漆光黝然張素嗜此出數百文買之持盒同寓進門蹉跌盒碎子拋落地有一二子略致墜損微露黃質細視皆渾金而外塗火漆者平之得一百四十餘兩市牲牢酌神擁贊而歸

燕郊鎮廢寺鑪臺

通州燕郊鎮爲山海關出入總路道旁有廢寺殿宇傾頽惟一香爐兩燭臺在焉鑪高七八尺臺丈餘重莫能舉以故久而獲全乾隆四十二年純廟謁陵經其地入寺以鞭扣鑪曰此非鐵聲也令侍衛錐破之皆黃金鑄成外塗火漆命移入內庫寺之緣起州志不詳後於牆陰掘得一碑乃明嘉靖時太監李璵家廟按明世宗約束內侍頗嚴李璵名不見史冊似非當時權貴而已豪富如是足知前明璵類之橫矣此物委棄荒烟蔓草中四百餘年往來行人何啻億萬計而皆不之識留待駐蹕始入大內於以知黃金積至數萬斤斷非臣庶所能倖獲也

海寧相國

海寧陳相國未遇時入都道經曹州適當牡丹盛開聞富室周氏園尤豔麗遂往觀亭中列大玻璃缸朱魚百頭噤喋可玩略一摩挲缸忽開裂方竊惶愧主人歡笑承迎邀入酒饌欸待極殷展詢邦族喜溢顏色曰夜夢黑龍盤缸上而缸裂今君適應其兆他日君貴願以兩息女附爲婚姻相國辭有妻室主人曰卽備妾媵亦無不可相國夙精星命見其意誠索二女生造推之並夫人格也惟次女帶桃花煞竊疑之解玉佩一枝聘其長女是年捷京兆旋入詞館迎女合卺焉後出使道經荏平輿中見一女邸姪村婦行酷似夫人女亦頻視相國使紀綱訪之果夫人妹也白翁故後嫁東阿士人早卒連遭荒歉遂落平康非所願也相國千金贖歸重爲擇配嫁滿州都統亦八座云

張魯傳先生

吾鄉張魯傳先生盛德士也年四十許夜夢二青衣持名柬來請乃乘肩輿隨之行至公廨刀山劍樹森列兩廡少頃傳呼開門王者冕旒盛服出迎張上座徐曰聞君品學心竊欣慕欲屈暫司筆札何如張辭有母王曰太夫人遐齡未艾且有哲弟奉養幸勿固辭張曰不特侍母必應躬親卽兒女何能拋擲王復欲有言張

怒曰就否須人自願何不近情拂衣逕出王送至廳下出署則乘輿不知何往傍皇道隅一叟扶杖至比鄰某翁也送之歸乃醒已死一日夜後壽至八十餘少時猶及見之

小河口水神

余已亥房師爲漢軍慶漁衫先生勛先生由農部郎以知府檢發浙江將題補湖州奉太夫人諱扶柩回京道出徐州小河口夜夢河神持柬來訪曰此席待君久矣辭以母喪未葬言次泣下神曰然則待君葬親後再遣奉迎遂醒葬畢謂家人曰小河口書吏來迎矣沐浴更衣跌坐而卒

史孝廉

漂陽史孟賓孝廉敬惜字紙數年如一日隆冬方焚字紙滿屋作桂花香咸卜爲發解兆乙酉春館樂亭令陳公上谷署課其少子甚嚴一夜至四更許生徒尙未去老奴張某至館緩頰史怒其干與叱之出明日告陳陳亦嚴飭之張夙有閉氣疾至晚不食死是科羣赴京兆試史固善卜占之得游魂卦疑張死由已堅不赴同人強之行瀕入闈又疑而逃衆掖之不得已匆匆終卷而出是科竟捷

浙江臬署鬼

同鄉汪君雲槎在浙江臬署掌刑名從學者三人汪居正房三徒分居廂屋嘗夜閱洋盜行劫一案傷痕不符呼徒問之屢呼不應乃自出喚見無頭鬼不計數依窗窺伺急呼從人并其徒至鬼始散盜七人皆應斬恐有冤濫細爲檢閱實無可縱釋者仍照原詳定擬所見豈被害之冤魂歟汪無子是年得舉男

長三四六

紹興某村富家生一子年七歲愛如掌珠清明門前賽會鄰有無賴子方博負見兒臂金鐲遂以絮塞其口竊抱至野盡攘所有投兒廁中其家遍尋不得一農人早起過廁見兒報其家赴縣控驗遍訪無蹤乃宿城隍廟虔禱夜夢神贈以牙牌二視之長三四六也疑莫能解易服親至其村訪焉適一廟演劇令於廟外牆陰啜茶一少年扯少年辮髮出曰長三此地殊擁擠何不往後臺去看婦女其人曰四六勿強扯人戲文正做到好看處我不往令頓悟密呼役拘之一詢吐實長三四六乃其小字也由是山陰城隍香火益盛

鰻怪

徽州上里潭白鰻爲患每出挾水電損人禾稼有腥霧觸之卽死土人患之詣龍虎山求天師驅治天師曰此鰻修煉千年頗有神通余亦不忍誅却乃付箸一雙紅白各一囑至潭先投白者如無風雷水不洶湧箸不浮起彼卽貼服否則更投紅箸不敢再肆矣乃當飭徽州城隍就近彈壓患可永除歸如其言甫投白箸風霆交作水起立數十丈箸浮其上急投紅箸始息其後每潭水漲溢或遇腥霧昇城隍神至潭邊卽平靜

落星石

蘇屬離里鎮夜有一星墮蒨星伯少府家大如方棹着地有聲火星四射家人輩以竿觸之軟如綿至曉光斂堅凝如石矣竿觸處一孔可貫繩索憶童時崔瘦生丈常携一落星石見示大不盈把作鐵色云是途中見星落所化以刀刮之屑隨手落嘗之味極甘

烟戲

劉文恭公生辰有巨公薦一術者云善烟戲呼至則癯叟也出烟管尺許烟斗大逾盎孟盛烟令滿吸一時許徐起登高几吐之水波浩淼雲霧瀾漫旋而樓閣重

重祿立水面乘鸞跨鹿者紛集一鶴銜籌翔舞穴際爲海屋添籌之戲吐畢下几烟凝結半日始散真絕技也憶少時見一僧向烟肆募烟出其烟具畧同術人吸畢徐徐吐出盤旋空際歷時乃散又一旗丁吸烟畢吐圈無數連吸連吐個個皆圓徐出濃烟一縷直穿圈中纍纍相屬如青蛛之在貫也

纓帽制虎

湖南有卒由亂山中飛騎送文書道經一山見虎蹲巖石上卒馳馬過虎驟起攫羽纓帽去帽胎被爪穿透纓纏爪上虎急欲擺脫愈擺愈粘狂躍不止卒窺見亟呼村人執挺往虎已墮澗中遂被縛

生魂忘死

都門開黃酒館多山東榮城縣人有某與鄰肆錢債細故銜恨伏要路刺殺之刑部審明擬抵刑有日矣某故與劊手善賂以金囑曰願少令痛楚劊諾之臨刑劊刀拍其項曰刃加頸矣速走某竭力一掙魂從竅出奔雄縣飯館中爲傭故善割烹大得主人歡贅以女年餘主人死遂掌櫃焉一日劊訪親至雄適投某店某見之謝活命恩劊驚問誰伊曰我卽所縱囚某也劊曰君誤耶若是某則爾日伏法

矣某聞瞠目仆地衣冠如蛻

生魂搶食

海州分轉洪芹野司馬徽州人也徽俗中元節延僧施食超度亡魂某寺主僧了塵有道行能視鬼癸酉七月洪延施食適本家叔祖至坐移時方去了塵問爲宅中何人曰本家叔祖曰此君恐不久人世矣昨夜渠生魂至壇下搶食被我用米打回也未半月果暴亡

城隍辦差迎節母

二伯祖母汪孺人未嫁守節五十餘年長齋奉佛凡恤孤賑貧一切善舉無不樂施年七十二疾亟有鍾氏媼病死復甦云赴冥司道經陽湖縣城隍廟前見某戚李媼招手隨至其家問李何爲曰兒在廟中作吏故遂家此媽媽來得大好今日城隍迎節婦甚熱鬧盍往觀乎拉鍾入廟西隅一臺結彩懸燈殊極絢爛聞鼓樂聲城隍盛服出廟門外旗幡羽葆逐隊前來女童二十餘執幡提鑪導與升臺一白髮嫗盛妝出汪太孺人也俄頃彩雲一片落臺前登雲向西而去鍾隨李出至一橋李從後推之一跌而醒令人來問則汪太孺人已於申刻辭世矣

李天寶

家奴李天寶秋日患熱病死一夜復蘇云死後見城中街道不類平時茫然獨行不知投足何所遇其素識之顧阿三泣求送歸顧曰我現有要事不能奉陪指前日向東轉灣卽城隍廟哥之外祖母沈老親娘現在廟中伺候太太可往尋之李至廟懇人帶入沈方吃飯問汝饑乎遂留其食飯畢求歸沈曰勿亟俟老爺退堂再說須叟城隍入本朝衣冠也沈攜李出跪階下向神不知何言神曰爾甥何名沈白之神曰並未勾到可速放還陽以手向其額一指大汗而醒越三年始死

陰兵

乾隆四十五年夏秋間蘇松常鎮一帶訛傳陰兵遍野樹頭皆有火光光中隱隱有旗幟黑衣紅褲層布如林惟面目模糊不可辨往往入人家翦雞毛割辮髮尤喜割婦人乳頭小兒陰莖鳴金逐之東伏西起至曉始寂舉國若狂有李生者夜臥置盆水床前聞窗上畢剝聲甲士長尺餘從窗櫺入逕登榻擊之墜盆內一紙人背插雞毛持利翦唇際血點殷然就燈燒之啣吻作兒啼聲未幾山東臨清州有王倫之變皆其妖黨所爲也

川福

尹川福從叔祖樸齋家奴也常籠畫眉從陸家園歸挂桐樹上樹下有五通祠就其旁溺焉歸卽病云魂爲神捉去罰令變豬不從則以萬針渾身叢刺又令變羊不從則燒鐵遍烙胸背如此兩旬奄存弱息一夜神又捉尹在樹下痛咎適先君從友人家飲歸神曰主人至矣抱頭竄去尹得脫病亦隨愈

申之璧

申之璧海州板浦鎮人娶徐氏兩家甚相近也偶薄暮過外舅家小飲不覺深夜無月色而星光燦然外舅命二子送之歸過劉姓酒肆中見二人立檐下不覺寒噤一人探懷出一紙示申卽収去字跡不甚了了有硃圈如官衙勾攝票狀兩妻弟見申立不行問曰君飲未醉胡若此申曰無之送至門兩弟去而前見二人已先在申叩門門啟二人遽入申頭目暈眩上階而仆家人掖起已不省人事方申暈絕時見二人欲牽衣行有翁媪自外入翁向索票視叱曰票係楊家集孫之璧此板浦申之璧音同字別安得妄勾扭與見官申隨行至一處殿宇高峻燈燭輝煌上坐冕旒綴珠五行衣黑錦袍金光閃爍良久聞上坐者曰悞矣速送還陽二

人并翁媼同送之歸遂醒病亦若失翁媼乃亡祖父母也訪楊家集果有孫之璧是日死

劉加年

劉加年新興瞳人性至孝刈薪爲生每日入市賣柴畢必購炊餅數枚歸奉其親平日必以甘旨奉親然後自食終身無倦乾隆乙巳歲飢人相食時加年已死其弟繼年除夕夢與馬喧闐二貴官各坐一輿旁吏抱尺籍從問汝瞳有大紳往何處官將往謁繼年不解連指數家皆不是至加年舊居加年一品服端坐其中儀狀甚偉二官人下輿入謁復登輿沿門錄冊或三口或五口或一門全入冊繼年心疑賑濟得注冊爲善從叔劉正玉者素有隙不爲請命未入冊至劉緒賢門爲之力請冀其全錄官人曰此鄉正直不宜入冊惟瞳前後數十家登記姓名戶口去春夏間數十家相繼疫死

惜字益算

海州諸生張愼修家板浦一生誠篤敬惜字紙乾隆辛巳年四十膈症甚危其友葛竹筠先得是疾昏去十餘日暝而不言張扶病往視葛曰我將死下一牌卽君

也君有一事未及行可速行之言訖而卒張慟之歸途念生平敬惜字紙凡路見片紙隻字拾歸焚化惟烟鋪包裹必用印記鄉愚無知作踐欲具說帖普勸立願未行岑葛所言母乃爲是因力疾書數十紙送各烟鋪竟卽遵行夜夢神謂曰汝本應死因勸人惜字加壽二紀勉之遂以刀刺其喉驚醒吐紫血數升疾頓瘳惜字益勤年至八十四卒子士熊亦得是症其弟士庶慰之曰先子患此因勸烟鋪不用印記遂得增算今烟鋪復染舊習吾兄曷刊板普勸以善承先志乎果不藥而愈

陰陽差役串騙

海州大伊鎮馬姓充本州衙役奉差之南鎮路遇一人亦伍伯裝束彼此問訊俱屬勾攝公事遂同行其人謂馬曰我陰差也所携川資將罄盍圖之馬曰何如其人挈馬入村有小兒嬉戲門外徧摸以手羣兒驚仆村人各抱負歸其人曰兄往借宿詐言善療令焚冥鏹樹下我卽使羣兒立起不惟某得路費兄亦可索謝儀豈非兩得馬如言所獲過望其人欣然分道去比差回夢拘至城隍廟陰差先在云羣兒祖父首告陰陽勾串騙詐錢財未幾升堂馬與某同入見數人跪稟畢神

拍案責具供狀各答三十革役驚醒兩股青紫數月始愈俄緣事被革

生人血可魔鬼

歙人吳東生嘗遊京師與葉王府張姓相識張家離城數十里旬日一值班一日回家行至半路見五人立道旁或前或後叱問不應抵家轉念欲窮其異乃結束作急裝復至其地五鬼仍在若相待者直前相搏半晌鬼勿退因咬指尖出血淅淅然復揮拳奮擊獲一鬼挾之歸燭之如冬瓜形色白兩目甚細口鼻悉具衆勸放之血魔不能去多方洗濯禳解始杳

小人

姑丈趙伯周州佐其尊人官粵歸携二小人盛以木龕長尺許一翁一媼手似鳥爪語啁啾不可辨飼以生米蔬果龕中有小箱盛冬夏衣服應時易著極畏寒嚴冬須密室籠火云西洋人所贈得自小人國者後翁死媼哭之慟不數日亦死盛以小匣埋之其僂僂國之民歟

魏封翁

魏封翁健齋先生太僕贊卿先生襄之父也精岐黃術爲人治病遇貧者往往贈

以藥資一日赴鄉治一大戶子婦疾枕邊有金簪旋亡失疑魏次日魏至家人婦迎問之魏問是何式樣重若干笑曰簪實我取因款式特佳携歸仿製失於告白耳歸覓金製如式付之未幾天時漸暖婦易牀褥金簪宛然大慚入城還簪并謝冒昧乾隆乙巳歲大飢封翁積米不滿百石即門前半糶以數升爲率頃刻而盡衆譁然封翁指囷示之曰此特行吾所安耳一夕有移屍懸其門鄰人謂翁此某所爲及官驗翁不言事平翁語所親曰余與某無仇怨累我特數十緡耳又何必更累以移屍之罪証佐之牽涉耶比屋屢不戒於火翁居獨無恙予以乙丑成進士膺五品封年八十四而卒

幕友阻撓善舉

白門蔡友石先生世松觀察廬鳳見管內民生計薄愀然思有以拯之商於其友某孝廉孝廉曰鳳陽地瘠民貧俗尙强悍偷惰成風以明太祖開國全力屢遷蘇松數十萬戶實之尙不能變爲富庶迨叔季兵燹蹂躪蕩焉無存我朝自開國以來歲有賑貸今且二百年卽鳳陽一邑而論糜帑不可勝計而地方毫無起色固由地瘠亦民俗偷安不知操作也地濱全淮溝洫不講疏濬無方旱則赤地干

里水則萬頃汪洋此時治欲端本非大興水利俾民悉趨農畝然後簡良守令撫綏非數十年不可以言乎急則治表惟有因勢利導之法國初白敬齋先生教民織絹至今猶享其利顧野桑飼蠶絲勁而縑薄其利不廣宜先於四鄉各置田千畝遣人赴嘉湖購桑秧就便募蠶婦四五十戶以爲民倡教之育蠶數年後桑田成熟湖民願留者與爲世業鳳民承種酌給而收其租利之所在人自樂趨久之巧遊四出之民孰不願安土樂業聞風而歸一二十年蠶桑遍野矣觀察慮費重孝廉曰鳳地賦輕土薄田每畝僅值錢千計每鄉千畝所費不過千金加以二三年桑種人工亦不過數千金得萬金則事可立就又慮桑非土宜孝廉曰即署中大桑合圍者且數十株且糞種如豆餅之屬多出近縣鑿成而後獲利必豐凡書院義學養老育嬰敬節諸善政皆有所資是一舉而衆善畢興也觀察喜明日以語鳳陽太守汪芝生霖太守願倡捐五千金觀察亦欣然出五千金太守歸告其幕客某某思無成案可援果辨則串事皆須草創自度才不能勝乃力阻不可謂民俗强悍蠶桑利成必肆攘奪釀成械鬪重案誰職其咎議遂中止逾數月某以事與太守意拂改就他幕方治文書忽二隸入綰以索至一署殿闕巍峨王者上

坐叱曰汝知罪否某愕然王者拍案曰君子成人之美汝阻桑田善政致數十萬生靈萬年衣食之資一言而敗汝算應九十一子進士官四品一子孝廉官六品今因一言削盡命鬼卒以金爪擊其胸大叫而醒未幾卒

乩仙前知

完顏曙墀太守廷鐸見亭河帥父也守泰安治尙清簡署設一室設仙壇叩以詩文醫學娓娓不倦問休咎則不答亦模糊不可解太守暨諸公子幕友皆與道號問答以號稱逐日所請各書之冊一日太守祈禱請示前程乩判幾百幾十字樣太守茫然再請又書聯語十四字似新婚所用吉語益不解書而藏之明年冬撫軍歲會甄別謂太守多病請以部員內用尅期北上時河帥觀政兵部亦請假來署料理啟行太守夙患疝症至是益劇肩輿隨二僕先行眷屬後發至一飯舖僕從皆覓食停輿店門食畢將行忽旋風大作飛沙走石繞太守輿數四目不能開風過揭帘則太守已昏臥輿中急抵尖站宿焉眷口亦至爭覓醫藥兩日而卒其旅舍堂聯卽乩判之十四字核計默禱至交替蓋幾百幾十日豈數果前定歟至誠之道可以前知於乩仙曷異焉

遇合定數

某部郎性恬退竟日伏案以經史自娛久之并堂期亦不至署一夕夢其父謂曰明日應上衙門醒而異之少頃又夢聲色俱厲因告夫人叱爲奇事夫人曰此不奇君自奇耳司官僦直循分應然君視到署若登天實所罕覩既阿翁諄囑何妨破格一行乎從之抵署同官都已到齊時祿相國康管理此部是日有公事將至內一少年戲之曰君今日殆爲中堂道喜來某問何喜少年隨口撫事以實之相國至諸司謁畢某獨行賀禮相國以面生疑爲別部司員宜從謙抑匆忙答禮某慌遽謝不敢不覺手拽相國索珠絕相國怒問知爲本部司官怒曰俟入內回再與計論登輿去羣責少年少年亦惶恐轉懇排解之策浼相國較契之某某帶某至朝房候其出爲之關說良久相國出顏色溫霽指某曰便宜他衆不解所謂環立悚然相國啞然曰某省知府要缺請簡放 上詢汝部郎中員外內有才具勝任者否乃諸君姓名概不記憶不覺以某對已奉 旨補授矣某向相國叩謝前嫌亦釋

酒仙

揚州士人聞湖上桃花盛開偕友沽酒往遊藉地對酌又來四人皆舊交因衣留飲傳壺把盞玉山並頽而斟酌不窮如有挹注客曰君今携酒幾何而百吸不盡耶言已啓壺則涓滴無存衆謂得遇酒仙云

鼠報恩

山左日照縣焦叟晨起於堂屋觀書忽一鼠人立作拱揖狀不爲動須臾又至亦如之聞梁上窸窣聲塵土亂落異之移步出院而屋塌矣蓋叟家已三代不畜貓云

某太守

刑獄至我 朝欽恤備至無枉濫者顧往往轉輾駁註由縣府而司院定讞幾經歲月罪名仍無出入而案外之拖累死者已不知凡幾丁酉冬某太守攝開封余爲入幕賓承詢通省要務有益百姓者舉三事以對一濫派夫馬須設法禁革以杜州縣官役分肥（欽使大吏過境所需車馬有數而州縣按里科派折價入橐胥役騷擾分肥）一積欠應豁免者亟宜清釐以寬小民敲朴（時方嚴追積欠河北三府州縣有仰承意旨追徵全完者大吏以爲能超擢之而民之斃杖下鬻

田產者多矣）一暫繫之待質平民宜專員設局經理其事並寬爲捐給口糧以免無辜拖斃太守於前二事多見施行惟暫繫一條謂兩造皆官爲養贍是導之使訟非息事寧人之道余默然適王澄川參軍在座閱其稿而善之携去後余來兩淮事閱十年太守已歸道山久已忘之今夏聞太守之子孝廉某遊淮安失足落河死方痛良吏之後不振如此扼腕久之月前太守之戚薛君道出刊上細詢狀薛愀然曰太守遺櫬尙留大梁長君眷口羈京邸一家星散矣因述其夫人曾夢太守謂生平居官清正間有偏執功過相抵惟駁湯君所論冥司責其見善不爲罪罰甚重今王澄川已將此稿付梓汝速印萬卷流播人間庶少救墮落也薛不知所論何事舉以問余余檢篋無存稿郵書河南錄得一通附記於此略曰國家以民命爲重幾於臯陶曰殺之三堯曰宥之三有犯必懲明律具在而於平民暫繫待質未有專條伏思臬司爲通省刑名總匯倘案情重大司不親提研鞫無以昭公道而服人心惟案經提省則一案之干連人證不能不與之俱來此輩或情節牽涉或挾讐誣攀初非皆有罪之人其在本邑已被胥吏洎呼里保逼勒迨至隨同批解冤苦填胸羈管公所既不能營作自給又無人爲之送衣具食所恃

每日官捐之十數文而此十數文之入腹與否尙未可知惟聽典守者之恣情尅扣非意凌虐夏則人多穢積疫癘薰蒸冬則啼號切膚饑凍交迫有目不忍觀耳不忍聞者試以遊跡所到言之於杭仁錢二邑縣門不時有屍擡出初以爲獄囚調之始悉其故計一歲瘦死者不下四五百人至皖館臬署每過懷寧橫屍待驗或二或三大約與浙上下及入保定則刑獄尤繁歲斃且七八百河南稍善然亦不下二三百人誰非赤子乃令無罪而就死地如其衆耶我 朝祥刑普化從無枉濫惟此等死者大吏不知本官莫問案內正犯或且事雪生還待質者則旗殯孤魂長填黑獄嗚呼冤慘極矣 國家每歲大辟不過數百起今以目覩情形合各省計之拖斃者奚止萬人其何以慰 聖主如傷之隱乎按罪囚入獄例有衣糧病則醫藥死則斂埋孕則停刑令典昭然有加無已而此獨聽之地方官捐辦具文坐令困阨至死無冤可鳴無傷可驗或屍親領回或就近瘞埋從無告發之事首府縣及委審諸賢亦遂習而忘之余以爲其弊有四一由於臬司審斷不速結一由於州縣解犯不齊全一由於捐辦經費無正項開銷一由於司事官役無責成考核蓋審斷不速則壓積必多提解不齊則動淹歲月經費絀勢將敷衍

刻剝苟且塞責稽核弛甚且禁卒憲役高下任情果能案提到省臬司隨即審結遇有牽連無關緊要之人立時省釋卽由臬司明定章程凡解省人証遲至一月不齊作何參處至於經費宜從藩庫撥欸的定數目按季支銷仍派委同通一二員專司其事月具清冊詳載舊管新收開除實在有一有疾病立卽醫藥取保猝有死亡詳院司年終核計多寡以定功過督撫定議入奏仍請通飭各直省一體遵照 聖明在上無不允行事非難成而生殺人之轉移在是矣嗟乎惻隱之心人皆有之士大夫抱已饑已溺之忱居大有爲之地操能挽回之權果能起而行之造福不公而且普哉

么四

么四姓胡新安伶也幼入都隸春臺部色藝噪一時貴陽某侍御狎之觀察河東携之赴任父事其閩人陳某大見信用援例得官長蘆會侍御轉運長蘆與陳表裡大招權賂旣而寵益固乘機擠陳而逐之凡巖政無鉅細皆入掌握商惴惴不敢少出氣母誕日召優演劇一老伶扮李龜年出場指胡大聲曰么四今日富貴遂忘出身耶我爾師也奈何倨見我乃痛訐其昔日在都媚人狀並近日威福諸

猥籍不堪事座客轟然散胡大慚棄官家揚州一日偕友遊湖上忽起跪庭心以手批頰無數曰忤奴敢背逐而翁耶語絮絮多責其負心事知爲陳所附家人許焚冥資百萬勿應未幾疽發背盡力醫禱罄所有乃死小人之交固不足怪然謂他人父始藉其力得志而遂背之又下石獨何心哉得死於疾幸已

鬼預看停靈之所

山東士人流寓京師質下窪子僧寺授徒携一僕一徒與寺僧對房居一夜僕被魔口操吳音唱崑曲數折宛轉合拍知爲鬼祟叱之擲以掌始就臥次早問之茫然不知入夜其徒出遺惶遽奔入面無人色問之但以手指戶外士人出視見藍衣婦徘徊庭心似不甚懼士人默念易經辟邪就案頭取擲之喚寺僧醒閉戶燃燭以待約一時許以爲已去就窺門縫直立如故至雞鳴始就寢次日有人至寺覓停靈所尋送柩至所懸影像則夜來婦也始悟初死之魂預來相視云

鬼父護兒

甘泉某甲與某乙積釁已久乙恒思於陰處殺之甲防衛嚴不能逞志甲死一兒方七歲家人命蒼頭挾之掃墓乙懷夙恨匿墓所兒至拔刀刺兒甲忽從墓中出

伏兒身乙刺十餘刀不能傷蒼頭號救衆奔集縛乙送官置於法嗚呼父子至性死猶忘身禦難如此爲人子者獨奈何忍死其親哉

錢生

錢生英秀往常州東門外家有空園恒往游矚見花間一紫蝶大如盤美人長一指許坐蝶背翩翩如跨鳳撥花尋之已不見疑爲仙忽忽若有所忘次日又一蝶銜小紙條翻飛生前撲之翔去紙墜襟袖間上有蠅頭小楷題一絕云花發滿園紅尋香小徑中懷人春意倦無力倚東風咏詩意益深遐想遂什襲藏之一日晚在齋中伏几臥覺有人以物穿其耳醒視一女郎旁案側手撚欵股見生醒却退生低聲問何來女曰妾家東鄰來索詩箋耳生曰詩箋誠在我處但不知所懷何人女笑曰閨中女伴偶爾相違便生離感豈必馳情閨外生曰蝶使良媒彩箋作合前緣已定何必非屬小生留與繾綣備極歡愛旣而日漸消瘦父母詰之不承僮僕聞夜間切切私語窺見與女並坐排闥入張皇問已失所在父母恐爲魅所蠱急爲畢姻合卺之夕方展氍毹行交拜禮忽風起堂廡異香滿室生失所在遍覓無蹤後三年戚某遇於錫山驚問何往生曰近日携家惠山新居咫尺能一顧

否遂與同行至山下果有小園點綴頗工延坐絮絮詢里中近事徐出酒饌亦極豐腴云贅此三年家事皆賴室人經紀即呼妻出拜約二十許人神光合離如朝霞和雪爲之目眩生以一裹託帶歸奉其父母某歸細述其事發其裏桃脯數片而已家人再至其處已隔宿遷去又十數年家中老嫗過生於郡城甘棠橋遽挈其姪生搖首曰勿爾我本欲回家可卽與汝同行嫗一脫手而生已杳遂不復見

十九猫同時殉節

汪稼門尙書次公子均之上舍夫人飼猫二十餘頭各有名號呼之輒至手調香餌飼之猫不食亦不食也夫人卒猫號慟不食方殮躍入棺中伏屍旁不動出之傍棺哀鳴汨如雨下不數日或投入池中或入灶突十九猫悉并命焉

鸚鵡報讐

魏子實議尉于役淮北之青口鎮畜一鸚鵡日飼松子毛羽可鑑渾身皆有異香性特馴善知人意魏奇愛之偶因事赴板浦一夜夢鸚鵡浴血向之哀鳴醒而疑之比返青口入門卽問鸚鵡所在家人答以某夜爲黃鼠狼齧死計其日卽見夢之日也魏祝曰汝有靈常誘所讐出穴吾爲汝報之越日將晚見羣奴操杖闔逐

云一黃鼠狼從戶外人竄進柴積內矣發柴殲之爲鸚鵡設祭焉微禽脆羽卒能自雪其讐固與尋常翹肖異矣

山陽狐

山陽陳紫涵秀才薄有才名而狂傲特甚每緣事侮其兄兄固長者含忍之暗中引泣而已陳一日早起於案頭得一紙書曰陳某自貢通品倫紀未明尙得謂讀書人乎余向居汪文端宅近因文端喪雖暫借汝居乃日來見汝無一可取惟知欺凌其兄故發憤一道汝宜及早痛悔勿謂暗室無人也陳閱畢疑兄所爲益怒詈忽空中碎石雨下頭面皆破陳往延文端長君侍御至聞大聲曰尊人道德文章足爲當代欽式我故敬畏君不謫藉蔭得官乃以道長自居耶不早去者視吾石俄一石擊侍御前案立碎陳方念早控獄帝空中又一紙飄落曰陳某汝某日某事欺兄如何昧心歷疏二十餘條余以正言相規不見聽納反欲讐我今夕當以烈焰燒汝矣至晚其妻方臥火自發陳裸身投地長跪哀之叟曰求我無益當求汝兄釋汝陳不得已與妻偕至兄所跪房外涕泣求哀叟令自陳向日負心事兄不忍聞亦痛哭掖之起曰吾弟知悔祖父之福也叟曰旣汝兄弟復睦我且去

次日兄弟同詣家祠誓改舊轍設筵望空祭謝焉陳由是門庭雍睦家法爲一邑最

翦雞毛

乾隆間蘇松常鎮諸郡譁言陰兵婦人乳頭小兒陰莖往往被割鬻髮剪去甚多鄉城如沸皆邪教匪徒流布爲之某紳有老妾畜雞二籠三更雞鳴不已亟燃火往一籠毛已剪落一紙人手持利剪鮮血殷然蓋剪毛時適爲是婦所屬而不能遯也燒之嗷嗷作聲

徐旭

常州府吏徐旭少年娶婦琴瑟甚敦甫三年妻病卒徐改業爲某大令長隨流轉至四川酆都貧困不能歸聞南門外有陰陽界試往遊行十餘里但覺天色昏慘白草黃沙彌望無際意頗中悔忽一車載囚服多人一役坐車轅見徐躍下道寒暄則陽湖班頭馮某也徐求附載一路叙語始知馮已死仍在城隍廟服役解犯來此須臾入城郭見肆旁一小門其妻在焉下車與語妻拉之入室細話別後事則轉嫁於八殿閻羅前之牛頭卒方叙契闊卒已外至雙手捧牛頭下如除巾幘

然則白面少年也。妻告前夫肉身來此。卒呼出見。相待極恭。令治具。妻曰：鬼饌不可飼生人。奈何？卒攜筐出門去。俄頃返漿酒羅列。徐欲一觀。冥獄食畢。卒仍取幘戴。攜叉前導。刀山劍樹肉磨油鑊種種駭目。遇一溪水。赤如血。婦女哀號其中。徐意卽血汚池。問皆產婦否？曰：產育乃天地生化之常。烏得有罪？凡世之主虐婢嫡虐妾惡姑虐養媳繼母虐前室子女生前非理慘毒無不入池受此酷報。遊畢而歸。留住三日。卒言明日將解蓋飯僧。十八人赴常州便道可送歸。次早呼徐起至門。諸僧皆細縛車載。卒與徐各跨一轅。妻泣送登程。食頃已抵里。至門卒解索驅諸僧由狗竇入。遂去。徐叩門母啟。納怪其面如黑煤。縷述所見。是夜家中母豬產十八狔。徐於天寧寺披剃爲僧。

木客

吾鄉小南門城隅鮑氏三女。色藝擅一郡。鵠母奇貨居之。木客某耽戀忘歸。挾貲數千金。悉寄頓其家。踰年鵠漸出惡聲。令諸女分宿於外。客方冀多金返璧。含忍俟之一日。置酒三女疊起行觴。鵠曰：客眷吾女。屈指兩年。徒以客故。不外交食。指繁多所存金已盡。客少年離家久。不如暫歸。今具贖銀二百餅。願賜莞納。客無由

與較太息而出抑鬱遂死同鄉某憐而殮之而鮑不知也一日長女對鏡理粧客揭帘入堅臥不起搗以其久不至或回家仍攜多金來覓人詢問始知已死轉告女匿女鄰家甫就枕冷氣盪人毛髮客已先臥從此寒熱不止每夜交接疲不可堪未幾瘵死又淫其妹趙秀才某與鮑次女昵叱曰生爲敗類死復淫昏何不知顏厚邪鬼擲以枕懼而逸於是次女亦鵲化其小者名蘭英尤媚媚母載往姑蘇甫三日鬼尋至曰汝母欲留此錢樹子耶挾之臥起數日亦病凡有眷蘭者至鬼輒現形相恐未匝月媚香亦萎夫客迷戀煙花死由自取徒以乾沒其貲半年之間連斃三命豈冥中但論報復不禁淫殺耶抑與三女本有宿世冤耶

漢口災

道光某年漢口被焚數千家有術士與一富翁一開棉花行者最契預洩其機先期兩家各搬運百里外而富家有地室火作親丁數十口皆避其中以爲安然無事矣鄰廟爲銅錫舖貯貨公所廟焚銅錫鎔汁入地室合家併命焉花行侯房主營造訖運回貨物擇吉開張是日敬神炮星落花上頃刻灰燼乃知勢不可逃而富翁尤慘

女鬼開燈

自雅片盛行江南州郡街巷皆滿謂之開燈武進汪阿正者業此最久後妻死扃屋他適一夕李某經其門聞烟味甚濃叩扉有少婦啓納之歡笑承迎取煙具出李臥榻連十餘口而應不解問婦婦曰想癮大非黑土不可李付錢婦入房另捧煙出味如前婦面漸青黑不類生人懼而起奪戶出婦從後追之李向前狂竄時夜已深市肆皆閉見剃髮鋪燈火尙燃急入備述所遭衆携燈往出門見婦人在前徐行綴之漸近其處忽不見次日入視榻上青蚨宛然

鬼贅婿

武進錢生家可中資其父於惠民橋開米肆每夜輒有小婢挑蓮燈導少婦至糶米如是經年店夥疑之尾之過橋卽不見疑爲鬼而所用錢皆真會中元節婦以小筐攜茄餅十餘枚持贈適值生相與目成取餅大啖頓盡數枚婦笑而去生忽發狂類傷寒謂家人曰婦與之訂百年約詰旦輿馬來迎次日具衣冠叩別父母登榻而逝是夕鄰人皆見燈籠數百沿河繁如星點隱隱有鼓吹聲咸謂錢生入溫柔鄉矣

伍八

郡城伍姓設元豐紬肆小夥伍八者族人也貌頗清俊每日有美婦來買零細久之而稔叩家何里婦曰觀予巷男子遠出不歸又無婢媼故獨行耳伍以言挑之秋波斜睨似甚欣屬低語曰明夜月上時可過我伍時未娶狂喜次夕如期往婦已俟門遂相繼繾綣由是蹈隙輒往將至中秋婦預約三更後當沽酒以待爲長夜歡至日初更即往則小扉雙扇扣之不啓問諸鄰則夫久出不歸婦已死三年停柩扁鑄焉次日啓視果有酒肴一席列左室中

四喜

中州南陽府附郭爲安陽縣雲氏者安世族也甲第連雲食指千計有東平遲孝廉與至戚計偕北行順道來訪館之齋中夜半覺有人撼之醒一美婢着縹綾半臂斜簪烏纓花綽有風格睨之而笑驚問何來曰妾四喜慕公子雋才來相伴耳心悅其美不暇詳詰摟之入衾歡愛備至次夜復來曲意承迎更善撫摩之術筋骨皆酥不覺沉沉睡去日高乃起由是更定輒至試期將近雲贈資促行遲戀戀不忍別因謀偕遞約以前途相待明旦遲行夜宿逆旅細雨廉纖方慮夜深泥淖

非纖足所能遠涉忽聞扣門聲啓戶則四顧然入遲喜一路攜以自隨頗忘旅寂是科捷南宮觀政戶部將接眷入都遲恐嫡妬四言無慮夫人至果虐遇之四伺應惟謹莫敢當夕嫡無隙可乘相與安之無何遲授南陽府掣眷履任遲以竊婢而逃內存慚悚每慚見雲而雲殊坦然一日遊雲後圃見短碣書亡婢四喜之墓驚問何人雲蹙然曰荆人愛婢十七天亡瘞此十稔矣遲駭絕備述前事雲夫人遣媼詣署覘之四方拈針牕下遙見媼入遽仆衣履如蛻遲悼歎欲絕請於雲遷櫬歸葬東平

煞神

常俗人死殮時以瓦罐覆地葬時起棺請巫誦咒破罐則曰煞神退矣或曰其形如雞高雲瀾明府先太宜人中表也所居有馮氏鄰新喪罐爲羣兒擊破煞神乃逸高後樓九楹久封扃忽時聞拍拍聲啓視一雞冠巨甚偉不知從何處來罩以巨籠條失所在

佛手傾家

濟南張某家巨富性愛花木庭院栽種皆滿畜佛手柑一盆結實長八九寸圍尺

餘寶愛之不輕以示人適撫軍購得大玉盤四欲盛物四種或以張佛手告令歷城令往索之張不肯令大恚未幾張婢爲妻所撻投繯死婢父母以逼姦致死控縣令拘張至笞榜備至逼誣伏強姦罄產營救僅得貸死流新疆訟解而家計蕩然矣

左中丞驅縊鬼

左杏莊中丞未遇時夏夜讀書苦蚊納兩足甕中見蓬髮婦探首窺簾公念家無此婦夜深突至必魅也出齋遍矚前婦衣藍衣頸拖長繩俯身向內室門縫悄然而望公出不意取木棍從後擊之踣地而號連撻之化黑煙一縷穿鄰壁去急呼鄰至告以所見次夕鄰女無故投繯死

校正翼翮稗編卷四

四十八

